

# INUIT ATAQATIGIIT

## Inatsisartuni



UKA 2019/ 131  
15.10.2019  
Mikivusuk Thomassen

**Namminersorlutik Oqartussat ingerlataanni errorsinermut qaqorsaait aammalu kingunerutit taamaallaat avatangiisinut innarliisuunngitsunik nalunaaqutsikkanik aammalu tipigissaateqanngitsunik atuilernissaat pillugu Naalakkersuisut peqquneqarnissaannik Inatsisartut aalajangiiffigisassaattut siunnersuut. Tamatuma ilutigisaanik inoqutigiinnut inuiaqatigiit errorsinermut qaqorsaatinik aammalu kingunerutit avatangiisinut innarliisinnaasunik atuinerisa millisinnissaat anguniarlugu Naalakkersuisut paasitsiniaanermik ingerlataqarnissaannik peqquneqassapput.**

(Inatsisartunut Ilaasortaq Sofia Geisler, Inuit Ataqatigiit)

Siullertut qujarusuppunga saqqummiussamut pingaaruteqartumut.

Paasilluarsinnaavara nuannaarutigalugulu siunnersuuteqartoq inunnut pinngortitamullu akornutaasumik mingutsitisoqannginnisaanik siunertaqarluni saqqummiimmat.

Tassami ulluinnarni eqqarsaatiginngitsoortaratsigu mingutsitisunik aniatsitilluta, errortornermi errorsinermi uffarnermi perusuersarnermi allatigullu, soorlulu ulluinnarni atugassatsinnik pisiniarnitsinni misissuilluaqqaanngikkaangatta arajutsisarsinnaasaripput akornutaasinnaasunik pisisarnerput.

Mingutsitinaveersarneq paasitsiniaanikkuinnaq anguneqarsinnaasoq Inuit Ataqatigiinngiit isumaqannginngilagut.

Tassami imartsinni nerisaqartuuvugut inuussutissarsiuteqarlutalu. Imaq uninngaannartuunngilaq, sarfamillu ingerlaartinneqarluni. Nerisagut sunnerneqartarput, taamaasillunilu peqqissuserput. Salinneqanngitsunik minguiarneqanngitsunillu killeqanngiusartumik imartatsinnut eqqaavugut. Nunarsuarmioqatitta tamanna paasigaluarunikku qanoq kinguneqarsinnaanera ilisimannngilluinnarparput, taamaattumik nunatsinnut sakkortuumik kinguneqarsinnaanera ilimagisinnaavara naak tamanna kissaatiginanngikkaluartoq.

Qaqorsaait kingunerutillu avatangiisinut innarliisinnaasut inunnillu ungasinnerusoq isigalugu peqqinannngitsut pillugit killiliinissamut Naalakkersuisut piumassusikippallaarnerat akissutaanni atuarneqarsinnaasoq isertorsinnaanngilara, paasitsiniaanikkut anguniagaqarnerat taamaallaat takuneqarsinnaammat. Piaartumik malunnaateqartumik inuit peqqissusaannik avatangiisinullu illersuisumik iliuuseqarnissamut timitaliinissamut siunnersuuteqannginnerat amigaatigaara, tamannalu tunngavigalugu nassuiaateqartoqarnissaa kissaatigaara.

Nammersorlutik Oqartussat ingerlataanni errorsinermi qaqorsaatinik kingunerutinillu tipigissaatitaqanngitsunik avatangiisinillu innarliinngitsumik atuisinnaalernissaat pillugu Naalakkersuisuniit tamakkiisumik akissuteqannginnerat pillugu ersarissaasoqarnissaanik kissaateqarpugut.

Tassami inuit ilaat anersaatuutikkut amikkullu sapigaqartuunerat tunngavigalugit, kingunerluutigisinnaasaat ulluinnarni takuneqarsinnaannginnamik imminnerminut paarilluaraluaanniluunniit sapigaqalerneq sakkortusereerluni takkussinnaasarmat, meeraaqqaniit utoqqartunut assiigiigatsik takkuttoornermi, sakkortuumik niaqorluttoqarsinnaasoq, timikkut naasoornerit, anersaartuutikkut iluaalliornerit, meriangulernerit, il. il.. Takornartaanngilaq kollegiani pingaartumik ukiukkut gangini errorrat panerserneqartarnerat, ilaat sakkortuumik tipigissaasikkanik kingunerusikkat, eqqarsaatigineqarani najugaqartut ilaasa sapigaqartuunerat.

Namminersorlutik Oqartussat ingerlataanni errorsinermut qaqorsaatit aammalu kingunerutit taamaallaat avatangiisinut innarliisuunngitsunik nalunaaqutsikkanik aammalu tipigissaateqanngitsunik atuilernissaat pillugu Naalakkersuisut peqquneqarnissaannik Inatsisartut aalajangiiffigisassaattut siunnersuuteqartumut Inuit Ataqatigiinniit tapersiivugut, tamatumalu saniatigut taperserparput inuiaqatigiinnut paatsitiniaasoqarnerunissaannik siunnersuuteqartup kissaateqarnera.

Avatangiisinik inuillu peqqissusaannik innarliisinnaasumik atuinitta millisarneqarnissaat anguniarlugu taakkunanga atuinermi suut ajoqutaasinnaanerat atuagaannartigut naammassineqarsinnaanngimmat, inuiaqatigiit tikillugit paasitsiniaasinnaaneq qanoq pitsaannerusinnaanerani Naalakkersuisut akissuteqannginnerat amigaatigaarput.

Avatangiisitsinnik pinngortitamik inuillu peqqissusaannik illersuinissaq Naalakkersuisut tamakkiisumik illersorpaat? Imaluunniit immannguaannaq illersorpaat? Naalakkersuisut isumaat paatsoorneqarsinnaanngitsoq qanoq imaqarpa?

Inuit Ataqatigiinniit pingaartitarivarput avatangiisit pinngortitarlu mingutsaaliorneqartoq, tassanimi uumasut inuussutigigatsigit, taamaattumillu aamma inuit ataasiakkaat peqqissusaasa innarlerneqannginnissaat soorunami pingaartitaralutigu. Qaqorsaatit kingunerutillu avatangiisinut innarliinngitsitut nalunaaqutsikkat taamaallaat atornissaannut aalajangernissamut Naalakkersuisut suna aporfigivaat? Uagut Inuit Ataqatigiinniit nalunngilarput suna isumaginerlugu tassalu illersorparput avatangiisit minguinnerusut inuillu ataasiakkaat peqqissusaat.

Siunnersuut saqqummiunneqartoq ilusimisut isikkoqartillugu akuerineqarnissaa innersuussutigalugu Inuit Ataqatigiinniit taperserparput, ataatsimiitaliamullu susassaartumut ingerlateqqillugu.